

Biblia alang sa Kabataan
motanyag



Si David nga
Hari (Unang
Bahin)



Gisulat ni: Edward Hughes

Gihulagway ni: Lazarus
Alastair Paterson

Gipahaom ni: Ruth Klassen

Gihubad ni: Mel Lorell Abugho,
Cheryn Mabano Abugho

Gipagawas sa: Bible for Children
www.M1914.org

©2023 Bible for Children, Inc.


Pagtugot: Mahimo kang mokopya o mopatik niini
nga estorya, ayaw lang ibaligya.



Ang batan-ong si David nagdagan. Gusto ni Haring Saul nga patyon siya. Nagpuyo si David sa kamingawan, sa dakong langob nga may upat ka gatos ka sumusunod.



Usahay, hapit na sila makit-an sa mga sundalo ni Haring Saul. Apan si David nagpadayon sa paglihok.



Ang sulugoon ni Saul, si Doeg, misulti sa hari nga ang mga pari mitabang kang David sa pag-ikyap. Gisugo sila ni Saul nga patyon. Apan si Doeg lamang ang andam nga mobuhat niini! Mapintas niyang gipatay ang kawaloan ug lima ka mga pari ug ang ilang mga pamilya pinaagi sa iyang espada.

Daotan kaayo kadto.





Usa ka adlaw niana,
gipangita ni Saul si
David ug miadto
siya sa langob diin
si David ug ang
iyang mga tawo
nagtago.
Nag-inusara
si Saul!



Diha sa langob, sayon ra untang patyon ni David si Saul. Hinuon, siya mikamang paduol ug giputol ang usa ka piraso sa luag nga besti ni Saul pinaagi sa iyang hait nga sundang.



Sa dihang mibiya na si Saul, gitawag siya ni David. "Niana giputol ko ang sidsid sa imong kupo, ug wala ko ikaw patya, hibalo i ug tan-awa nga walay kadautan ni pagsukol sa akong kamot..."



Si Saul miingon nga siya nagbasol sa pagsulay sa pagpasakit kang David. Apan sa wala madugay, mibalik ang iyang kasuko ug nagtigom siyag 3,000 ka sundalo aron patyon si David. Usa ka gabii niana, samtang nangatulog ang kasundalohan, si David ug si Abisai, usa sa iyang mga sundalo, misulod sa kampo sa hari diin natulog si Saul.





"Gitugyan sa Diyos ang imong kaaway nganha sa imong kamot karong adlaw," mihunghong si Abisai. "Palihug tugoti ako sa pagbunal kaniya sa makausa pinaagi sa bangkaw ngadto sa yuta: ug dili ko na kinahanglan nga dunggabon siya sa ikaduha."





Si David mibalibad. Gikuha niya ang bangkaw ug banga ni Saul, ug mibiya siya sa kampo. Gikan sa usa ka bungtod tabok sa dalan, si David misinggit hangtod nga nadungog siya ni Saul. Sa makausa pa nakita ni Saul nga mahimo unta siyang patyon ni David, apan wala niya buhata. Ug sa makausa pa, si Saul miingon nga nagbasol siya sa pagsulay sa pagpasakit kang David. Apan si David nahibalo nga dili na siya makasalig sa pulong ni Saul.






Niining higayona namatay na si Samuel. Siya ang propeta nga gisugo sa Diyos nga dihogan una si Saul, dayon si David ingong hari sa Israel. Sa dihang gisulong sa mga Filistehanon ang Israel, si Saul naghimo ug usa ka makalilisang na buhat, usa ka butang nga ginadili sa Diyos.



Iyang gisugo ang usa ka babaye sa pagtawag kang Samuel gikan sa dapit sa mga patay. Nianang gabhiona, nakadawat si Saul ug mensahe.



"... Ang Ginoo mibiya na kanimo ug nahimong imong kaaway... Ang Ginoo naggisi sa imong gingharian gikan sa imong kamot ug gihatag kini sa imong isigkatawo, nga mao si David. Ugma, ikaw ug ang imong mga anak mouban kanako. Ang GINOO Itugyan usab niya ang kasundalohan sa Israel ngadto sa kamot sa mga Filistehanon." Sa pagkadungog niini ni Saul, nakuyapan siya sa kahadlok.




Ang mga Filistehanon nakig-away batok sa Israel, ug ang mga tawo sa Israel nangalagiw. Gipamatay sa mga Filistehanon ang mga anak na lalaki ni Saul, apil na si Jonatan, ang suod nga higala ni David.



Si Saul grabeng nasamdan sa mga magpapana. Ug siya miingon sa iyang magdadala sa hinagiban: Ibta ang imong pinuti, ug dunggaba ako niana, tingali unya kining mga dautang tawo moabut ug dunggabon ako, ug magadagmal kanako. Apan ang iyang magdadala sa hinagiban wala mosunod, kay nahadlok siya pag-ayo. Busa, si Saul mikuha ug espada ug nahulog niini.





Sa pagkakita sa mga lawas ni Saul ug sa iyang mga anak nga lalaki, ang mga Filistehanon nagtaod sa mga lawas sa paril sa usa ka nailog nga siyudad sa Israel. Giluwas sa pipila ka maisog nga mga Israelita ang mga patayng lawas, gidala sa balay ug gisunog kini sa wala pa ilubong ang mga patayng lawas sa Israel.





Sa diha nga si David nakadungog sa makalilisang nga mga balita, siya nagbangutan ug mihilak ug nagpuasa hangtud sa kagabhion alang kang Saul, alang kang Jonathan nga iyang anak nga lalake, ug alang sa katawhan sa Ginoo, tungod kay sila nangapukan pinaagi sa espada.



Bisag si Saul misulay sa pagpatay kang David, gipasidunggan ni David si Saul ingong dinihogan sa Diyos hangtod sa kataposan. Karon gipasidunggan sa Dios si David, ug gihimo siyang hari ilis ni Saul.



Si David nga Hari (Unang Bahin)

Estorya gikan sa Pulong sa Dios, ang Biblia,

makita sa

1 Samuel 24-31; 2 Samuel 1-2

"Ang pag-abot sa Imong mga Pulong
nagahatag og kahayag." Salmo 119:130





Ang Kataposan



Kini nga estorya gikan sa Biblia nagasulti kanato bahin sa kahibulongan nga Dios nga nagbuhat kanato ug gusto Niya nga kita makaila Kaniya.

Nahibalo ang Dios nga nakabuhat kitag daghang daotan. Gitawag Niya kini nga sala. Kamatayon ang silot sa sala. Pero nahigugma pag-ayo ang Dios kanato. Iyang gipadala ang bugtong Niyang Anak nga si Jesus aron mamatay sa Krus ug silotan tungod sa imong mga sala. Unya nabanhaw si Jesus ug mibalik sa Langit! Kon motuo ka kang Jesus ug mohangyo nga pasayloon ka sa imong mga sala, himoon kana Niya! Moanha Siya ug mopuyo sulod kanimo karon, ug mopuyo ka uban Kaniya hangtod sa kahangtoran.

Kon motuo ka nga kini ang tinuod, ingna ang Dios:
Ginoong Jesus, ako nagatuo nga Ikaw Dios, ug nahimong tawo aron mamatay alang sa akong mga sala, ug karon Ikaw nabuhi pag-usab.

Anhi sa akong kinabuhi ug pasayloa ang akong mga sala, aron mabag-o ang akong kinabuhi karon, ug unya makig-uban ako Kanimo hangtod sa kahangtoran. Tabangi ako nga motuman Kanimo ug magkinabuhi alang Kanimo ingon nga Imong anak. Amen.

Basaha ang Biblia ug pakigsulti sa Dios kada adlaw! Juan 3:16

